



AD HENRICVM IV.  
GALLIAE REGEM  
CHRISTIANISS.  
IN EIVS NVPTIAS  
Octauij Menini I. C. Foroiulienfis  
bonarum Artium Nuncij  
O R A T I O.



SVPERIORVM PERMISSV.

---

VENETIIS, CID. IDC. I.

Ex Typographia Andreae Muschij.



Orationem hanc  
**AD CHRISTIANISS.**  
**GALLIAE REGEM**  
**HENRICVM IV.**

In eius feliciss. Nuptias scriptam

AMPLISS. VIRO  
**ANTONIO GRIMANO**  
**TORCELLIENSI EPISCOPO**

*Octavius Meninus Iuris Consultus Foroiulienfis*  
*Dat, Donat, Dedicat.*



**Q**UOD ille munus libentissime,  
quantum coniectura assequi li-  
cet, accipiet. Primum enim in  
ea Rep. natus est, quæ tantum  
Regem in oculis fert, quæque  
ei vicissim hæret in medullis.  
Deinde, id quod maxime ad rem pertinet, Regi ipsi  
nedum de facie notus, verum etiam mirifice cha-  
rus est, nihilq; facit libentius, quam cum aut alios  
de eius præstantia, & felicitate loquentes audit, aut  
ipse loquitur. Postremo quantus quantus est, ni-  
hil aliud nisi benignitas, & suauitas est, quemad-  
modum insequentes testantur versiculi.

VENVSTE Pictor, viuidas  
Qui pene das imagines  
Spirare, pene das loqui,  
Scin', quid mihi potissimum  
Hac in tabella pingere  
Nunc te velim? Dulcedinem,  
Suauitatem, Gratiam,  
Ipsamque Pulchritudinem.  
Tum quicquid est sanctū, & pium,  
Summoque gratum Numini,

Quicquid decorum moribus  
Illis bonis, & aureis,  
Qui Principes viros decent,  
Eosque cælo collocant.  
Roges, ut hæc coloribus  
Idonee, apteque exprimi  
Queant, & oculis subiici.  
Ne pendeas diutius  
Venuſte Pictor, inclytum  
Noſtrum GRIMANVM pingito.





# AD CHRISTIANISS. GALLIAE REGEM.



**L**A est, HENRICE IV. Gallorum Rex  
Christianissime, apud Principes viros,  
apud liberas ciuitates, apud florentissi-  
mas Respublicas, apud maximas natio-  
nes, uno verbo, apud gentes omnes  
per vniuersum terrarum orbem longe,  
lateq; diffusas, tui nominis vel admira-  
tio, vel charitas, vel vtrumque, vt neminem fere inter mor-  
tales esse existimem, qui, quaecunque tibi in vita usu ve-  
niunt, ea ad se quoque pertinere non arbitretur, & si lata  
sint, ac iucunda, non incredibilem quendam ex eis hauriat vo-  
luptatem. Vel hæ ipsæ tam faustæ, tam fortunatæ Nuptiæ,  
quas cum MARIA Medicaa, magni Francisci, qui Hetru-  
riæ Dux fuit, & Serenissima illius Ioannæ Austriæ, quæ Fer-  
dinandum Imperatorem optimum, & religiosissimum, pa-  
trem, Carolum illum V. itidem Imperatorem post hominum  
memoriam longe maximum, & inuictissimum, patrum, alios  
summos, & potentissimos Principes cognatos, affines, perne-  
cessarios habuit, filia nuper confecisti, quantam non solum  
Galliæ, ad quam potissimum huius rei fructus est peruenturus,  
verum etiam Italiæ vniuersæ, alijsq; Prouincijs quamquam  
longo

longo intervallo disjunctis letitiam attulerunt? quos plausus  
 ubique gentium excitarunt? quibus studijs, vocibus, accla-  
 mationibus omnium ordinum, generum, omnia tibi secunda pre-  
 cantium, & augurantium cohonestatae sunt? Sed quamquam  
 hæc res omnibus mirifice grata acciderit, audebo tamen dicere,  
 vel potius dico, nullam fuisse tantam cuiusquam voluptatem,  
 quæ cum ea, quam nobilissima quædam Matronæ, quæ te uni-  
 ce diligunt, quæque nihil magis optabant, quam eam diem vi-  
 dere, cum proli ex te nascitura spes aliqua oriretur, possit con-  
 ferri. At quæ tandem sunt istæ Matronæ tam insignes, tam  
 honestæ, tam studiosæ, & amantes tui? Sunt Artes illæ, (iam  
 enim loquar apertius, nullaque circuitione utar) quæ libera-  
 les, ingenuæ, bonæ nominantur; quæ si humanum sub aspectum  
 cadere possent, omnes homines ad se amandum impellerent; sine  
 quarum luce cuncta iacerent in tenebris, densissima quadam ca-  
 ligine circumfusa; quas olim exules, extorres, rerum omnium  
 inopes Carolus ille Magnus, omnium, quotquot unquam fue-  
 runt, Principum laudatissimus gremio suæ benignitatis exce-  
 pit, & in hoc celeberrimo orbis terrarum domicilio collocavit;  
 quas longo deinde intervallo Franciscus Valesius eius nominis  
 primus tam amanter, & officiose amplexus est, ut alijs titu-  
 lis pulcherrimis prope neglectis, quos ei & in gubernando pru-  
 dentia, & in pugnando virtus, & in secundis rebus modera-  
 tio, & in adversis constantia tribuerunt, unico illo mirabili-  
 ter fuerit delectatus, cum se litterarum parentem intelligeret  
 appellari, quem etiam in eius sepulcro incisum videmus ad po-  
 sterioritatis memoriam sempiternam. Hærum igitur ego nun-  
 cium, & interpretem hodie apud te ago. Harum nomine ad te  
 de hisce nuptijs gratulatum venio, is, qui minime omnium, cui  
 hæ partes imponerentur, si ad eas sustinendas vis quædam præ-  
 stantis ingenij, lactea dicendi facultas, aureum eloquentiæ flu-  
 men

*men necessarium est, dignus fuerim: at, si fides eximia, summum studium, inaudita erga augustissimam coronam hanc reuerentia, mira vite ipsius pro sceptri huius dignitate augenda contemptio, aliaque huiusmodi verborum ornatu sunt potiora, qui ad hanc obeundam Legationem deligerer, non indignus fortasse. Sed quonam pacto obsecro mandata exhauriam, munerique suscepto satisfaciam, nisi, quam sit iusta gratulandi causa, demonstraro? quo pacto autem id demonstrem, nisi, quam te Vxor, Tu regno, Regnum ipsum perpetua Regum ex te venientium serie dignum sit, planum fecero? qui porro hoc planum faciam, nisi & regni, & tuas, & præcellentissimæ Coniugis tuæ laudes celebraro? qui vero celebrem, cum neque sublimia nisi demisse, neque magnifica nisi tenuiter, neque illustria nisi obscure, neque ampla, nisi ieiune possim tractare? Ut ut tamen potero, dicam, nec verebor, ne non iuram patientie quoquo modo dicenti paulisper accommodes, præsertim cum me non sponte mea, sed alieno rogatu, & iussu verba facere intelligas. A regno igitur, ut hunc ordinem sequar, capiamus exordium.*

*Regnorum nobilitas, quantum ipse quidem existimare, & mediocris huius iudicij mei imbecillitate consequi possum, cum multis alijs ex rebus pendet, & oritur, tum ex his quinque potissimum, temporis diuturnitate, rerum domi, forisque magnifice gestarum gloria, religionis veræ cultu, legum sanctitate, harum met ipsarum liberalium Artium, quarum orator sum, usu, & cognitione. Etenim, cum illud cogitamus, vim consilij expertem, ut faciles habeat ortus, & incrementa, facillime tamen sua mole ruere, vim prudentia temperatam sensim in maius prouehi, prouectamque diutissime conservari, & ipsam aternitatem, quoad rerum humanarum conditio patitur, emulari, sit necessario, ut regna illa, quæ annis*

*inu-*

innumerabilibus pene steterunt, non temere, non violenter, non per scelus, atque iniuriam, sed moderate, ac sapienter gubernata fuisse iudicemus. itidem, cum bella commode, prosperaque administrari nequeant, nisi in Imperatoribus scientia rei militaris, virtus, auctoritas, felicitas, in militibus fortitudo, tolerantia, obedientia reperiatur, quæ nationes magna gesserunt, ijs, facile adducimur, ut nihil istorum defuisse arbitremur. Adhæc, cum diuinum numen pie, incorrupteque se colentibus præsto esse soleat, & ad res maximas efficiendas opem ferat, quibus populis diuinitus consultum videmus, apud hos summo religionem in honore fuisse cogimur confiteri. Præterea, cum legum sanctione nihil aliud agatur, nisi, ut homines ad ea, quæ recta, & cum virtute coniuncta sunt, impellantur, reuocentur à contrarijs, quid aliud possumus opinari, nisi, ubi leges optimæ, & sanctissimæ vigerunt, ibi licentia, & sceleris parum, continentia, & innocentia plurimum extitisse? Postremo, cum tot, tantaque sint litterarum utilitates, commoda, subsidia, ornamenta, ut his enumerandis nulla par inueniri possit oratio, quid relinquitur, nisi, ut omnium rerum expetendarum copiam illuc affluxisse dicamus, ubi hæc floruerunt, sedemque certam, & portum tutissimum habuerunt? Sed si ullum unquam regnum fuit, quod omnium rerum istarum concursus nobilitarit, Gallicum profectò est, Gallicum inquam regnum est illud, cum quo si quis ullum aliud ex his, quæ monumentis veterum celebrantur, comparandum censeat, hunc ego censeam aut rerum ignorance, & imperitia labi, aut liuore, & maleuolentia, quominus recte indicet, impediri. Quod enim per Deum immortalem unquam fuit aut diuturnius, aut rerum strenue gestarum gloria præstantius, aut veræ pietatis studiosius, aut legum excellentia ornatus, aut litteris cultius, atque doctrinis? Assyriorum?

at



at illud per quingentos paulo amplius annos stetit, ut plerisque probatae notae auctoribus video placuisse. sed fac stetisse per mille trecentos. quid aliud insigne habuit, praeter insignem impietatem, & execrabilem superstitionem? Medorum? at res eorum brevi dilapsa, & ad Persas translata est, ac, dum viguit, nulla, quod sciam, apud eos praecleara facinora, nulla vera Dei cognitio, leges nulla, nulla litterae. Persarum? at eorum quoque opes quamquam magnae intra paucos annos summo est fastigio collapsae concidere. nec iniuria. quam nefarii enim apud eos ritus? quam incestae libidines? quam detestanda matrimonia? quam fœdæ filiorum in parentes conspirationes? quam saevae fratrum inter se de regno dimicantium caedes? Macedonum? & illud cum Alexandro illo Magno florente floruit, cum eo cadente prope cecidit, ut Regem ipsum tanquam hastae cuiuspiam mucronem fuisse dicas, quo adempto, aut praefracto hasta quoque ipsa omnem vim suam, & vulnerandi potestatem amittit. quamquam etiam si Alexander ipse in Italiam traiecisset, & in Torquatos, Cursores, Decios, alios id genus Duces, qui tum Romae erant, incidisset, haud meliore fortasse fato, quam alter Alexander eius avunculus visus foret. ac tametsi eius aetati, qua nulla bonarum artium fuit feracior, leges, mores, institutaque non improbanda, in primis vero philosophiae laudem concesserim, verae tamen religionis lucem affulxisse negarim, sine qua cetera omnia pro nihilo sunt ducenda. Parthorum? at id cito suum ad occasum peruenit, & nihil memorabile fere in eo reperias, praeter Crassi necem, & Aegyptijs effeminati delitijs Antonij fugam, quae tamen ipsa macula Romano iniusta nomini praecclare à Ventidio, egregia postmodum de hoste parta victoria, deleta est. At Gallici regni aetas, ut ea omittam tempora, quae ante Pharamundum, à quo Regum ordimur seriem, effluxerunt, annum millesimum ducentesi-

*mum fere attingit , & ut auguror , felicissime usque ad eum diem , qui orbi supremus erit , producetur . Gloria vero militaris est tanta , ut si hic paululum vela pandere , & vel ex innumerabilibus , quæ possent commemorari , pauca seligere , & in medium afferre velim , non videam , quemadmodum ad exitum peruenire possit oratio . quid enim illustrius victorijs sub Clodoueo primo , sub Dagoberto , sub altero Clodoueo comparatis ? quid insignius pugnis Carolo Martello duce pugnatiss , eaque potissimum , qua nostræ religionis hostes ita deuicti sunt , ut ex eis trecenta octoginta quinque millia cæsa tradantur , cum ex Gallorum acie vix mille fuerint desiderati ? quid commendatius hominum memoriæ sempiternæ , quam expeditiones Pipini ductu , atque auspicijs pro Sacrosanctæ Ecclesiæ Romanæ incolumitate , pro Pontificia dignitate susceptæ ? quæ litteræ vnquam silebunt Longobardos sub Carolo Magno deletos , Saxones continenti triginta annorum bello perdomitos , Hunnos fugatos , Afros , qui Hispaniam obtinebant , cæsos , Romam ab imminente excidio liberatam , vniuersæ Reip. Christianæ meliorem faciem restitutam ? Quæ vnquam tenebris inuoluet obliuio bellum sacrum in Syria non semel gestum , cuius bonam partem , seu periculum spectes , seu gloriam , Galli sibi vendicare , & quicquid ex sententia obtigit , Diuinæ primum benignitati , suæ deinde virtuti , quicquid incommodi est acceptum , Sociorum negligentiae , aut malitiæ possunt ascribere ? quid memorabilius , quam aliorum bellorum , quæ à D. Ludouici temporibus usque ad parentum nostrorum memoriam gesta sunt , periculosissimæ tempestates , maximorum euentuum nouitates , fortunæ omnia miscentis varietates ? Nam quid de veri illius numinis vero , & sincero cultu , quid de optimarum legum , quibus usque ad hanc diem res tum publicæ , tum priuæ apud Gallos gubernatæ sunt , custodiæ , quid de istis ipsis morum for-  
matri-*

matricibus, animorum ornatricibus, errorum expultricibus literis dicam? quis usque eò vestro nomini insensus est, qui, si me dicentem audiat, hæc omnia regnum in hoc regno obtinuisse, æquo animo non sit laturus, vereque id à me dici, concessurus? O Gallia, Gallia. te enim nunc appello, te consaluto, te, si non quas mereris, at quibus possum, laudibus efferre gestio. Sed quibus obsecro te appellem nominibus? Tu regnatricis; Victrix, triumphatrix. Tu eximium totius Europæ decus, rei Romanæ subsidium, Pontificum maximorum indignis acceptorum modis perfugium, Venerabilium Antistitum Undique ex Christiano orbe ad indicta Concilia huc confluentium receptaculum, nostræ religionis nunc barbarorum immanitate, nunc Hereticorum nequitia in extremum propè discrimen adductæ firmissimum propugnaculum, ipsius præpotentis Dei armamentarium, ex quo telorum vim maximam ad hostium suorum furorem, comprimendum solet depromere. Quid tibi optem potissimum? quid à Divum benignitate precer? id scilicet, quod tu maximè concupiscis, hoc est, ut Henrico 14. quamdiutissime incolumi, sospite, florentissimoque perfruare.

Sed quoniam de Galliæ laudibus pro mearum Virium tenuitate, satis multa, pro rei ipsius dignitate, parum multa, pro ea, quam omnes habent, istarum rerum notitia, nimis fortassè multa mihi dixisse videor, ad te ipsum Rex maxime me conuerto, ut eorum alterum, quæ proposui, absolvam. qua in parte iccirco brevior ero, quod non tam aliarum Virtutum tuarum, quam eximiæ illius modestiæ, quæ in te elucet, habendam mihi rationem intelligo. & Vero optimi cuiusq; Principis est, malle laudanda agere, quam laudari. En igitur quoddam veluti numisma, in quo tuam effigiem, perpusillam quidem illam, & inchoatam potius, ac rudem, quam absolutam, & perpolitam licet inspicere. Duo sunt tempora, per quæ humana hæc vita tradu-

citur, Pacis alterum, alterum belli: illud quidem securius, hoc splendidius; illud, quo magis oblectere, hoc, quod magis admirere; illud ad utilitatem, hoc ad famę celebritatem accommodatius; illud plebi, infimęque sortis hominibus, hoc nobilitati, virisq; alta spectantibus, & glorię cupidis aptius; utrumque tamē eiusmodi, ut alterum alterius successione, & mutua opera egeat. Nam, si semper Pax vigeat, quę vires ocio non frangantur? quę industria non languescat? quod ingenium per socordiam non hebescat? quę vitiorum seges non succrescat? quod cupiditatum effrenatarum bellum non exardeat, quovis bello quamquam periculoso magis horribile, & pertimescendum? Contra, si perpetuum bellum geratur, quę Civitates viris, equis, pecunia non exhauriantur? quę oppida non spoliuntur? quę agris vastitas, hominibus perniciēs, rebus omnibus clades non importetur? Si perenni pace fruamur, ecquando viris fortibus dabitur occasio, vitę, quę natura debetur, pro Patria profundendę? Si semper dimicandum, quam raro eveniet, ut vita, quam, ut quisque fortissimus est, ita maxime se pro Patria profundere paratum esse profitetur, naturę potius reseruetur? Si pacata semper, & tranquilla omnia, ubi Alexandri, Scipiones, Marcelli, Cæsares? Si nunquam non bello turbida, armorum fulgore oculorum aciem perstringentia, tubarum clangore perstreptentia, ubi Platones, Homeri, Cicerones, Virgilij? quid multa? Sic ille magnus rerum omnium sator, & gubernator statuit Deus, ut hæc se vicissim, tanquam æstatem hiems, hiemem æstas excipiant, & consequantur. Quod cum ita sit, qui regali è Solio, quo eum aut diligentium fauor, aut ius legitimę successionis euexit, populos sibi subiectos, suo à nutu, supercilioque pendentes regit, hunc ego & belli, & pacis artibus, ad quas veluti comes, & administra maiestas quędam oris, & pręualida totius corporis firmitas

mitas accedat, instructum, atque ornatum statuo esse oportere: Nam cui pectus est minime generosum, excelsum, magnificum, & altissimæ illius fortunæ capax, qui curas, labores, vigilias, vitæ pericula recusat, qui in Solem, pulveremque prodire reformidat, qui militis, arma, equos, commeatus, machinas bellicas parare non studet, qui non comitate, sed aurium fastidio, non humanitate, sed difficili aditu, non beneficentia, sed acerbissima vectigalium per varios sinus, variaque prædandi vocabula impositorum exactiōe Principem agit, qui diei brevitatem convivijs, noctis longitudinem voluptatibus metitur, qui clementia miseros, liberalitate inopes, iustitia oppressos erigere, excitare, recreare non didicit, qui nec ipse scit consulere, quid in rem sit, nec bene consulentibus ut aurem præbeat, animum potest inducere, qui ob insignem oris, ceterorumve membrorum deformitatem, si non odio, at contemptu saltem, & irrisione tum suis, tum alienis dignus videtur, is quo pacto quaso imperium fortiter, prudenter, feliciter administrabit? quo pacto fines suos ab hostium incursione, vastatione, direptione prohibebit? castris locum capiet? commeatus expediet? ab insidijs præcauebit? tempus pugna deliget? aciem instruet? firmabit subsidijs? quo pacto, cum pax erit, ciues, negociatores, suos, externos in officio continebit? frena efferenti sese, & euaganti licentiæ iniiciet? ciuitates pronas in luxuriam, & affluentem omnium copia voluptatum lasciuiantes ad modestiam reuocabit? tenuiores potentiorum iniuria arcebit? Virtutum intermorientium, oculosque iam iam claudentium studia accendet? atque, ut omnia paucis complectar, regnum suum tum malis depellendis, tum bonis omnibus comparandis in summo felicitatis gradu collocabit? Contra, cuius pectori incognitus terror, manibus torpor, pedibus fuga, qui non temeritatem, sed prudentiam, non timorem, sed magnanimitatem,

non

non inanem ambitionem, sed veræ gloriæ cupiditatem in consilium adhibet, qui non architectos voluptatum, sed rerum laudandarum auctores, & suosores intimam in amicitiam recipit, nullumq; maius, aut melius imperij instrumentum putat, quam bonos amicos, qui illis disciplinis, quæ vitiorum fugam, periculorum pro communi salute susceptionem, mortis contemptum pro dignitate suadent, imbutus est, qui cum virtutes omnes, tum iustitiam potissimum cæterarum dominam, & reginam virtutum, & cuius fruendæ causa bene morati Reges constituti sunt, colit, qui formæ ipsius præstantia, & dignitate omnium in se ora, oculosque conuertit, omnium beneuolentiam sibi conciliat, cui corpus bene constitutum, ætas integra, optimus habitus, vires maxime, & ad tolerandos labores idoneæ, hoc rerum gubernacula moderante, quæ pacis ornamenta, quæ belli adiumenta populi, vrbes, prouinciæ sibi non audeant polliceri? Atqui tu is es Henrice xv. (dicendum est enim aliquando, dicendum est inquam, ne præuaricationis subeam notam,) Tu igitur is es, qui & belli, & pacis artibus ita abundas, prudentia, iustitia, comitate, & liberalitate, peculiaribus Regum virtutibus, alijsque eiusmodi, quarum opinione populorum amor erga Principes commoueri vehementer solet. ita excellis; omnibus dotibus, quæ naturæ, & fortuna beneficio tribui possunt, aut studio, & exercitatione comparari, ita excultus es, ut, quoties te intueor, & contemplor, toties formam ipsam, & speciem perfectissimam, omnibusque numeris absoluti Principis mihi videar intueri. Ac primo quidem, quod ad militares artes attinet, quantum his præstiteris, testes sunt isti ornatissimi Equites, Tribuni, Præfecti, quorum corona confectum hunc cingit, qui te, quo tempore in armis eras, quid moliendum, quæ loca præsidij firmanda, quæ vrbes obsidende, qua ratione in obsessas commeatus importandus, bellum ne ducendum, an in vnus horæ

horæ aleam coniiciendum, Vicatim ne circumferendum, an tota  
 eius moles unum in locum conuertenda, quando aperto Marte,  
 quando astu pugnandum, ubi insidiæ instruendæ, ubi pontes  
 fluminibus iniiciendi, qua peruadendum, quo progrediendum,  
 sæpissime, prudentissimeque differentem audierunt. Testes mi-  
 lites tum singuli, tum vniuersi, qui te labore cum quolibet gre-  
 gario certantem, primos hostium impetus excipientem, tuos  
 obiectu pectoris tegentem, per cesorum acervos iter aperientem,  
 calorem, sitim, inediam, hiemem, imbrem æquo animo feren-  
 tem, tuo incommodo aliorum commodis, tuo periculo aliorum  
 securitati, tuis vigilijs aliorum quieti consulentem, tantum  
 animi ac roboris tuis addentem, ut, cum tuæ virtuti omnia  
 prona, ac peruia fore existimarent, ita inirent certamen, ut ma-  
 nibus comprehensam victoriam tenere viderentur, nullum bo-  
 ni Imperatoris, nullum strenui militis officium prætermitten-  
 tem, laudem fortibus, solamen inualidis, fomenta saucijs, exem-  
 plum omnibus dantem conspexerunt. Testes vrbes quamplu-  
 rimæ, quarum alias ita defendisti, ut seruariis, alias ita oppu-  
 gnasti, ut ceperis, alias ita obsediisti, ut ad deditionem compu-  
 leris, alijs ita pepercisti, ut malle videreris eas tibi deuinci-  
 re, quam vincere. Testes Principes exteri, qui tuæ inuictæ  
 fortitudinis admiratione adducti florentissimas res suas cum  
 tuis adhuc turbidis haud grauate miscuerunt, & quin omnia  
 optatum ad exitum perduceres, non dubitarunt. Testis po-  
 stremo orbis terrarum vniuersus, qui se angustiores esse con-  
 queritur, & confitetur, quam ut tuæ gloriæ amplitudinem ca-  
 pere possit. Aliarum vero virtutum tuarum, earumque Ar-  
 tium, quæ comites, & alumne sunt pacis, testis est hic pulcher-  
 rimus rerum status, in quo nunc Gallia conquiescit, hæc mira  
 felicitas, quæ summum ad fastigium iam peruenit; quod fieri  
 certe non potuisset, nisi ea omnia in te forent, quæ tantam feli-  
 citatem

citatem parere, & tueri solent. *Testes omnium mortalium, unum, idemque sentientium voces, quæ te Galliæ lumen, nobilitatis decus, plebis perfugium, armorum gloriam, pacis templum, Ecclesiæ columen, tuorum propugnaculum, hostium terrorem appellant. Nam quid de oris ipsius pulchritudine, & dignitate dicam? quid de virium robore? quid de totius corporis firmitate? quæ bona adeo te insignem, & conspicuum reddunt, ut, qui te viderit, & non amarit, non coluerit protinus, non tanquam numen aliquod de cælo delapsum suspexerit, is omnis humanitatis expertus, & ab omnibus gratijs alienissimus meritò possit censerì. Sed video me prouectum longius, quam constitueram. Quare de te dicendi finem faciam, de citius magnitudine & præstantia nullæ mortalium lingue, nulla unquam scriptorum monumenta conticescent. iam vero de Serenissima Vxore tua (idenim reliquum est) pauca dicere aggrediar, cuiusque effigiem in altera numismatis parte, rudis, & imperitus faber, pro exiguis ingenij viribus insculpam. Sed da mihi quæso hanc veniam, ut à te paulisper sermonem auertam, & ad hanc ipsam Nobilitatem Gallicam conuertam; ita enim, cuiusmodi Reginam acceperit, facilius poterit intueri. Scitis igitur Illustrissimi viri, quæ nam vobis diuino munere Regina sit data? Ea nempe, quæ tot, tantisque & animi, & corporis ornamentis prædita est, ut, nisi Henricus IV. in terris extitisset, qui eam sibi matrimonio copulasset, cælibem fortasse vitam agere necesse habuisset, cum tam dignum virum reperire vix posset. Ea, quæ nisi ad Reges pariendos diuinitus accita esset, in hoc corporis domicilio collocata, nihil nisi de cælestibus cogitasset, mortalia omnia neglexisset. Ea, quæ Blanchas, Annas, Claudias, Catherinas, ipsas etiam Clotildas, alias omnes præstantissimas fæminas, quibus huic Regiæ gloriari licet, & quarum apud vos memoria sancta, & percelebris*



bris est, non æquabit solum, verum etiam superabit. Ea, quæ pietatis in Deum, obsequij in virum, diligentia in familiares, liberalitatis in indigentes, clementia in afflictos, misericordia in supplices, severitatis in se ipsam memorabilia exempla edet. Ea, quam fortuna ista celsissima de gradu moderationis nunquam deiciet. Ea, cuius in fronte maiestas cum humanitate, in ore pudor cum hilaritate, in lingua affabilitas cum gravitate, in manibus beneficentia cum sinceritate ita eminent, ut nihil admirabilius, nihil divinius fieri posse sitis existimaturi. Ea, quæ opes maximas, & quasi thesauros quosdam rerum pulcherrimarum, ac preciosissimarum huc secum attulit, quas plena manu quoquo se vertet, est effusura. nec mirum. primum enim sub cælo Italo, de cuius laudibus, etiam me tacente vos non siletis, deinde Florentiæ nata est, hoc est, in ea Vrbe, quæ Carolo illi Magno si non primordia, & fundamenta, at incrementa certe sua refert accepta; & cui tantus Imperator tantum non tribuisset, nisi suo favore dignissimam indicasset, ac quasi diuinasset tempus aliquando illud futurum, cum Gallia inde potissimum sibi Reginas deligendas putaret. Præterea ex Medicæa familia edita est, quam fortissimorum Ducum, amplissimorum Cardinalium, maximorum Pontificum seminarium possumus appellare. Adhæc maternum ei genus tam altum, tamque præclarum est, ut nihil in terris illustrius, nihil sublimius reperiatur. nam, ut longissimum ordinem Regum, & Cesarum, qui ei maiores, & sanguinis auctores contigerunt, prætermittam, & Rodolphos, Albertos, Federicos, Maximilianos, Philippos, Ferdinandos, à quibus ortum ducit, nominandi labore supersedeam, quanti illud est, quod, quemadmodum initio dixi, Carolum V. necessitudine attingit? Carolum, inquam illum, in quo ornando virtus cum fortuna certavit? cuius imperij magnitudinem Oceanus ipse, qui or-

*hem terrarum amplexu finit , nullis terminis circumscripsit ?  
 postremo , cum adhuc esset puellula , in illa ineuntis ætatis imbecillitate , faustis sub penetrabilibus ea diligentia educata est , his imbuta moribus , his informata verbis , opinionibus , atque sententijs , quæ futurae magnitudini possent quandoque conuenire . nihil enim cum lacte ipso suxit , nihil accepit , nihil didicit , nisi magnificum , nisi laudabile , nisi diuinum . quo factum est , ut iam tum homines nescio quid maius præfaga mente augurari inciperent , iam tum dicere solerent , eam aliquando non solum nobilissimæ illius familiæ , non solum patriæ , non solum Italiæ , sed totius prope Europæ clarissimum lumen futuram . Hæc igitur est , quam nos Itali vobis Gallis Reginam dedimus , atque ita dedimus , ut non dum satis constituerimus , magis ne nobis , qui dedimus , an vobis , qui accepistis , letandum sit . pulchrum certe nobis dedisse , & maxime gloriosum . at vobis accepisse non solum pulchrum , verum etiam fructuosum . Tanto igitur bono lati fruimini , quod nobis quoque , qui dedimus , maxima erit letitiæ , & ornamento .*

*Nunc ad te inuictissime HENRICE redeo , & hanc summam facio rationum mearum . Si regni istius dignitas , amplitudo , ac maiestas est tanta , ut ad eam nihil possit accedere , & si tu tantus es , ut , tu ne regno , an tibi regnum maius afferat decus , difficile facias ad iudicandum , ac postremo si Regina ipsa te viro dignissima est , quid restat , nisi , ut , qui rem Gallicam bene constitutam , & perpetuo florentem volunt , hi iure latentur . per hæc Nuptias ad spem liberorum , qui in possessione tam altæ fortunæ , tamque nobilis sceptri permanebunt , eamque posteris tradent , aditum esse patefactum ? Quis vero tui amantior , & obseruantior ; quis Regina deuinctior , quis incolunitatis tanti regni studiosior , quam bonarum Artium chorus ? Ut igitur extrema cum primis consentiant , earum verbis tibi*

de

